



Literatura den Bon Dia

Ernesto E. Rosenstand



TUR COS A KEDA ATRAS

Pues tabata su pensamentonan ya cu nunca nan a papia concretamente riba esaki. Nunca el a haya e oportunidad pa trata e asunto aki

Den e asunto aki e no kier a perde tempo. E no tabata presta pa sigui topa cu Juan sin sa kico lo por bai ta e consecuencianan aki. Tur su otro amiganan tabata casando. Y e no kier a keda atras. Esei tambe a haci cu el a pensa cu e tambe mester tuma e paso aki. Y lo mester haci esei lo mas pronto posibel.

Y e tabata convenci cu Juan tabata e persona aki. Y cu e tambe lo kier a casa pa di e manera ei forma un hogar.

Su curason namora tabata mira den Juan e homber ideal. Esun cu por a dun'e e felicidad cu cua el a soña asina hopi biaha. Y cu e tabata spera haya un dia. Y esei tabata presentando awor aki.

Despues di e yamada di Juan pa puntr'e con a bai cu e show di moda a pasa basta dia sin cu el a mira o papia cu Juan.

Esei mes tabata algo straño, algo cu e no por a compronde. Y cu e no a spera. El a spera di topa cu Juan mas prome. Ausencia di Juan a haci cu mas y mas e tabata kier tabata ceca dje.

Personalmente e no a topa cu Juan ainda despues cu esaki a yega fo'i Merca. Na telefon so el a tende su stem. Dia cu el a yam'e pa puntr'e con a bai cu e modeshow. Juan a compronde cu e modeshow tabata Carmen su delega. Esei el a ripara caba dia di e fiesta.

Ma un atardi asina Carmen a sali fo'i e pacus el a reconoce su auto. Juan a bis'e cu lo e bin busk'e.

Su curason a bolter den su pecho. Por fin nan lo topa cu otro. Anto sin spera. Juan a haci manera e no a mir'e. El a haci esaki pa mira con Carmen lo reacciona. E tambe tabata ansioso pa topa cu ne. Ma e kier a mira Carmen su reaccion y p'esei mes el a play un tiki hard to get.

Despues di tanto dia sin topa cu otro. Carmen mes a sinti cu su curason a cuminsa bati hopi mas lihe y a bai cerca dje, lo mas lihe cu e tabata por. E sorpresa aki a emocion'e masha hopi. Ki sorpesa!

E tabata sintie atraí di un forma cu e no por

a splica. Ma esei no tabata nada straño pasobra e tabata sigur cu e tabata namora na dje. Anto con.

Ma na e momentonan ei no por a splica su sentimentonan. E no tabata sa si loke cu e tabata sinti ta amor o pasion, ma ki ta porta? E todo caso e tabata un sentimento straño, hopi straño.

Na mes momento uno hopi dushi. Uno cu na e momentonan ei a trece cambio den su ser. Anto sin spera. E no por a compronde cu e por a keda entusiasmo di mir'e despues di tanto luna. Pa prome biaha den su bida e tabata sintie atraí pa un homber, anto di un manera inesplicabel. Di un manera cu e no por a splica.

Tabata manera un forsa invisibel tabata purba hib'e cerca dje. Anto con? E tabata anhela tur ora pa e por ta cu ne of e ta unda cu e ta. E sensacion cu e tabata sinti e mes no por a splica, ma si e tabata sigur, cu e por a duna tur loke cu e tabatin pa sigui topa cu Juan. Pa continuamente nan ta hunto cu otro. Loke delaster tempo no por a sosode.

Fo'i hopi dia caba e tabata anhela pa e por bolbe topa cu ne. Y awe el a haya e chens aki. Sin spera. E no a yam'e pa bis'e cu e lo bin busk'e despues di trabou. Ata Juan ta ward'e. Pues un sorpresa enorme cu e no a spera di haya.

El a subi su auto y a bai keiro. Core den auto, cabamento di un dia. Ora cu biento fresco tabata trece frescura den un dia cu a haci asina hopi calor. Algo fantastico! Esei so e tabata haya asina dushi. Y Juan tabata sa esaki masha bon. Prome Juan no tabata sa unda e bai, ma coriendo poco poco nan a pasa dor di hopi caminda den cunucu.

Esei tabata e camindanan cu Juan tabata gusta mas pa keiro. Esei pasobra ei banda na no tabata conoce. Y ta masha poco trafico tin. Y den cunucu tin basta luga bunita cu bo por gosa ora bo pasa banda di nan.

E no kier pa hendenan mir'e ta keiro cu otro mohe den auto y p'esei e tabata bai den cunucunan unda practicamente ningun hende tabata conoce. E tabata evita pa nan mir'e y asina lo bai cuminsa papia y Ana lo por bin haya sa.

Na cuminsamento tur dos a keda keto. Tur dos tabata perdi den nan pensamentonan. Y ningun di dos tabata sa con cuminsa. Ma di repente Carmen a puntr'e